

तृष्णा



तृष्णा

(खण्ड काव्य)



सिद्धिचरण

पिकाकः—

फलचा पिथना,

ओमवाहा, ये

व्याक्क अधिकार लेखकया

ह्वापांगु पिथना

ने. सं ११११

मूः— १२/-



धाक्कू:-

कान्तिपुर प्रिण्टिङ्ग प्रेस

ॐ बाहाल, काठमाडौं ।



२१२८५५, २१६६१६ पो. व. नं. १४१८

घःमाः

आयु फुनावन शक्ति गनावन

तंगु मखु थुगु तृष्णा

धकाः जि भन्दै बासः दँ ति न्ह्यो च्वयागु खः । धात्थें तृष्णा
धयागु भीत गबलें मप्वनीगु अवलम्बन खः । वास्तवय् संसार छुं
मखया नं थ्व ब्याक्कं खः । थनयागु सुख दुःख, राग-विराग सक्तां
भीके ल्यनाच्चंगु दु । मनूतं गुलि सशक्त व ऊर्ध्वगामी खः उलि हे
भीत क्वफाइगु अनेनेगु विघ्न बाधां प्वंगु मखु ।

भीसं ह्यगसय् खगु खँत ब्याक्क न्ह्यलं चायेव मिथ्या जुया
वंसां थ्व मिथ्यां भीत कय्कय् च्यानाच्चंगु दु । तृष्णा छुं हे मखु, थ्व
गनं दुगु नं मखु । दथुइ वइ, दथुइ तुं वनी । अय्सां थुकिं अनेक
मनूतय्गु जीवनयात क्वफाःगु दु । गनं थकाःगु नं दु । थ्व हे खँ
बांलाक सीकाः निलिप्त व निःसंग जुइगु महान्ता खः ।

भौतिक सुख दुःखयागु प्रभाव हे जीवन खः । थ्व मदुगुसा
भीगु जीवन नं दइगु मखु तर थुकिइ भी न्ह्याबलें दुनाच्चन धाःसा
भी उखे लाः थुखे लाः दइमखु । था गाः मदुगु महान्वकारय् भी
लाइ । भीके शरीर दु, विचार दु, हृदय दु व भीके चेतना दु ।
थुकियात बांलाक ज्या छ्यला यंके फःसा जीवनय् असंगति धयागु
छुं हे मदु ।

जीवन छगू न्ह्यइगुगु क्रीडास्थल खः धइगु थुइकाः भीसं भीत
ज्वनेगु हे मुक्ति खः । छुं मखुगुया पासं भीत कयंका तःगु दुसा वहे

पासं छुते जुइगु सार्थकता खः । “पाशवद्धो जीवः, पाशमुक्तः शिव” ।
जीव शिव जुइगु इवलय् भीं सदां उन्मुख जुइमाः ।

मनू गुलि द्यो खः उलि हे पशु नं खः । देवत्व व पशुत्वया
दथुइ मनुष्यत्व ब्वलनी । साहित्य च्वइपि मनूतय्सं थःत हचयेके
मज्यू । वं गुलि थःगु देवत्वयागु खँ निर्भय जुयाः ल्हाइ उलि हे
थःगु पशुत्वयागु खँ नं ल्हाये फयेमाः, थःत छर्लंग जुइक उले
फयेमाः, साहित्यिक खँय् नांगाप्वचि च्वने फयेमाः । वं थःत
स्पष्टतः उले मफुसा वयागु साहित्य उलि ग्राह्य जुइमखु । राज-
नीतिइ सनीपिसं थः त्वपुइत गथे विभिन्न बादयागु वस्त्रं थःत
छायेपेमाः, अथे हे साहित्यकारं थःत उलेत छुं आवरण तयेमज्यू ।
कामवासनां प्रेरित जुयाः थमं यानागु असामाजिक ज्या खँ नं वं
छर्लंग उले फयेमाः, सुचुके मज्यू । थ्व हे विचारयागु द्वन्द्व थ्व
‘तृष्णा’ काव्यय् दु ।

जीवनय् मनं तुना थें फुक ज्या जुइमखु । परिस्थितियागु
घःचालय् लानाः छताया छता जूवनी । इलय् ब्वलय् जितः थ्व
तृष्णां याःगु हैरानी जि व्यक्त यानाः चाःगु लँपु लुइकेत कुतः
यानागु दु । थुकिइ जि गुलि सफल जुल, असफल जुल छिकपिनि
न्ह्योने तयाबियागु दु । जिगु इच्छा जुजु भर्तृहरियागु शृंगार
शतक, नीतिशतक व वैराग्य शतक थें च्वये धयागु खः । जि
थुकियात शृंगार, नीति व वैराग्यया धाराय् अभिव्यक्त यायेगु
कुतः यानागु दु । नीतियागु थासय् थःगु देशयागु वामलाःगु
परिस्थितियात कयाः थमं थुकिइ छुं याये मफुगुलि असन्तुष्टि
पिब्वयागु दु । जि थ्व खँ थुकिइ अप्वः धयागु दु थें च्वं । आः
थुकिइ मेगु खँ अप्वः धायेगु इच्छा मदु ।

जीवन धयागु छगू पू मवंगु बाखं खः । व हे पू मवंगु
बाखंया छगू करुण अभिव्यक्ति जुयाः पाठकपित्त छुं आलोक
बीकत धाःसा जि थःगु कुतःयात सफल भाःपे ।

शरीरं भाय् मल्हात धाःसा भीके दुगु इच्छा नं पूर्ण मखु ।
 ह्यगुदँयागु वयसय् न्ह्याबलें छता न छता त्वय् नं दुःख बियाच्वंगु
 इलय् दुगु छुं इच्छा नं पूर्ण याये फइमखु । व्याक्क इच्छायात
 जिं मदयेका छवयेगु हे जिगु सन्मार्ग खः । इच्छायात त्याग याये
 फइगु भिंभिगु कर्म यायेगु खः । उकिं सःस्यूपिसं धाइ-सम्यक् कर्म
 धयागु हे निष्काम कर्म खः । सम्यक् कर्म, सम्यक् जीवन पाखे
 न्ह्याये फसा हे जिगु कल्याण खः । थ्व हे खँयात जिं निरूपण
 यायेगु कुतः यानागु दु ।

गबलय् गबलय् जिं च्वयेत च्वयातयागु आः जितः लो नं
 मने धुकुगु, उखे थुखे लानाच्वंगु जिगु हस्तलिपि भ्वंयागु द्वय्
 मात्तुमालाः जिमि काय् रविचरणं थुकियात मुंका तःगुलि थौं
 फणोन्द्ररत्न वज्राचार्यजुं थ्व काव्यया प्रतिलिपित कथं हंक छथाय्
 मुंकाः छसिकथं ल्ह्यायाः थुकियात सफूचायागु आकारय् पित कायेगु
 ज्या यानाबिज्याःगु खः । थुलि हे पाठकपिन्त थ्व काव्य न्ह्याकेत
 'धःमाः' जुल ।

धन्यवाद !

ने. सं. ११११ मांया खाःस्वयेगु

सिद्धिचरण

सवाः

मनूया जीवन मचा ल्याय्म्ह बुह्ला जुयाः न्ह्याइ । मचा ला मचाःम्ह हे जुल । थ्व संसार छु खः, गथे खः, छाय् खः धयागु वयाके ज्ञान दइमखु । ल्याय्म्हसु सकतां ख - जीवन व जगत सीगु थुङ्गु, ज्या याये फइगु थुबल्य् हे खः । मचावल्य् चुलि जाःगु जीवन ल्याय्म्हबल्य् ह्वइ । अले थुकिइ शृंगारया सुगन्ध वइ । ल्याय्म्ह ल्यासेबल्य् शृंगार रसया चर्ति मप्याःपि सु दइ ? इमिगु मन न्ह्यपु म्ह फुकं थ्व हे रसं फूचायाच्चनी । कल्पनाया विमानय् च्वनाः व्वयाच्चनी । त्ति न्ह्याःलिसे सन्ध्या सत्तिना वइ, थथे हे ल्याय्म्हया ई न्ह्यान्ह्यां बुह्लाया ई न्ह्याये दयेकः वइ । वीत रागया भावनां वैराग्य जायावइ । थ्व नंसर्गिक प्रवृत्ति खः ।

मनूया मन मस्तिष्कं अनुभव याःगु खँ मेपि कनेसइमखु, कवि कनेसइ । कविजुजु भर्तृहरियात शृंगार भक्ति वैराग्यं गथे थ्यूगु खः भी कविरत्न सिद्धिचरणजुयात नं थथे हे थिल, गुकिया लिच्वः थ्व 'तृष्णा' खण्डकाव्य खः । जीवनय् यौवन न्ह्याम्हेसिके नं वः थुबल्य् थिमिके युवासुलभ कविभाव जायावइ । उर्कि थुबल्य् थिमिसं शृंगार रसं जाःगु कविता च्वइ, मे च्वइ, मे हाली । जीवन रसया सवाः काइ ।

ल्याय्म्ह ल्यासेया यइगु येचाइगु प्रीति खःसा देश व ईश्वर प्रतिया आसक्ति भक्ति खः- प्रेम ला थ्व नित्तां प्रेम हे खः । प्रीति थहां वनाः देशभक्तिया कविता च्वइपि कम हे जक दइ । थ्व

‘तृष्णा’ काव्यया कवियाके देश प्रेमया भाव गुलि बिलिबिलि जाः धयागु थ्व काव्य व्वनाः सीदइ; थन धयां छु धाये, गुलि धाये ?

जीवनया तगिनय् वृद्धावस्था छत्वाथः खः, गन थ्यन कि यवव खँ सी, थुइ, जीवनया रस भोग यायां उलुयावइ वैयाग्यं लसकुस याः वइ । थ्व काव्यया अन्तिम च्वः नं थ्व हे खः ।

तृष्णायात नेपालभाषां प्याय् चाइगु धाइ । प्याय् चाल कि लः त्वनेत्वनेगु जक तीव्र इच्छा जुइ । कविया जीवनया इवलय् थी थी अवस्थाय् जूगु तीव्र इच्छाया छगू मूर्तरूप थ्व ‘तृष्णा’ खण्ड काव्य खः ।

कविरत्नजुं थथे थःगु जीवनया इलय् व्यलय् थःत अनुभूति जूगु भावाभिव्यक्ति विभिन्न कापी व भ्वं कूचाय् च्वया-तयादीगु मुंका कविरत्नजुया काय्भाजु रविचरण श्रेष्ठजुं जितः लः लहानादिल । थ्व मुंकेगु वचं वय्कः कविरत्नजुं जितः बियादिल । छन्दकथं माः हनाः मुनायंका । थ्व मुमुं लह्यलह्यं जितः थथे ताल छन्द कवियात वन्धन मखु खनी, भाव स्वस्फूर्तरूप न्ह्यानावइ-वलय् छन्द अथेहे वइ गथे लःधाः कुहां वइवलय् छुं मपंक सः वइ । ‘तृष्णा’ खण्डकाव्यया धात्यों सवाः कायेगु खःसा छन्द अनुसार लय् तयाः व्वनेमाः अले जक थुनिया सवाः ताइ । लय् मतसे व्वन धाःसा थुकिं मस्तिष्कयात ला थी, हृदययात थी कि मथिइ धाये थाकु ।

थ्व काव्य लह्यये सिधःबलय् जितः थुजागु आनन्द वल, थ्व कनां कने फुगु मखु, धयां धाये सःगु मखु । अले थ्व काव्यया स्रष्टा प्रति जिगु छयो श्रद्धां ववछुत ।

थ्व ‘तृष्णा’ नेपालभाषा साहित्यया रत्न खः ।

तृष्णा

न्हापांगु सर्ग

कल्याण ज्वीगु मखु छुं गुगु कर्म यानाः
व कर्म याय्त मन छाय् च्वन थौं न्ह्यब्वानाः ?
याये मत्यो थथे लिपा पछुताय माली
धाःसा थ्व चित्त उलि हे वनि हा अचाक्लि ।

॥ १ ॥

चा नं ह्लि नं छ जक छाय् लुमनाः जि च्वंगु
छंथाय् वयाः जक सदां च्वन्य मास्त्य वैगु,
लोकं छु धाइ थन हाय जि ठाय् मग्याःगु
याय् हे मत्योगु थुगु कर्मस छाय् जि न्ह्याःगु ?

॥ २ ॥

छं काल नित्य जिगु चित्त ह्लिलाः मुसुक्क
छं यात वय् सरि जितः मन तय् मफ्य्क,
जालय् जि लात मफु हाय थनं पिहां वय्
जिं याय्गु गय् थुगु कथं मन थौं सह्याले ?

॥ ३ ॥

त्याय्हो जि ज्वी धुन, जि ला अधिकारवन्त
 स्वां ह्वैगु गय् कयबस वय् धुनकाः वसन्त,
 अस्वस्थ चित्त मखु ह्नां थ्व स्वभाव खालि
 काम प्रवृत्ति वइ आयु थ्व न्ह्याः वसैलि ।

॥ ४ ॥

बांलाःगुली म्दु छ जो थन थौं थ्व लोकय्
 धात्थें अपार हिसियागु धुकू दु छंके,
 बल्सी समान जुल छंगु मिखा जि न्या थें
 हा ! नित्य छट्पट् जुयाः मि जलाय् चवना थें ।

॥ ५ ॥

वा छं जितः अमृत चुम्बन पान याकि
 थातं मलाःगु जिगु चित्त थ्व शान्त याकि,
 हे रूपसी, सरस रूप व छंगु त्वंकि
 हे कामिनी, जिगु नुगः थन तृप्त याकि ।

॥ ६ ॥

ह्लिलाः मुसुक्क व कयाः जिगु अंकमाल
 यानाव्यु छं जिगु मनोरथयात पूर्ण,
 हे सुन्दरी, जिगु व्यथा फुक लंकि लंकि
 स्यंकाः नुगः व्यथित याय् मत्य बिन्ति बिन्ति ।

॥ ७ ॥

चा नं ह्नि नं छ लुमनाः व्यवहार माःगु
जिं याय् मफे वन अहो थथ्य छाय् छु जूगु,
छंथाय् वयाः च्वन्यगु ज्या जुल एक मात्र
छु धाइ लोकन धकाः तक शर्म मन्त ।

॥ ८ ॥

मेपिन्त छाय् छु दु कनाः जुइमाःगु झीसं ?
वा सुम्क वा जिगु मुल्य् ग्वतुलाः छ च्वंवा ।
व छंगु प्राणलिस्य प्राण थ्व त्वाक छ्यानाः
झीपि निम्हं छम्ह जुये सु खनाः छु ग्याय्माः ?

॥ ९ ॥

छाय् व्यर्थ ग्याःचिकु जुयाः मतिना सुलाः याय् ?
यत्थे सनाः प्रणय वा निम्हस्यां इना काय्,
योयोगु थास थन चुम्बन वृष्टि याः वा
संसार सागरस यत्थ्य ह्मितः जुये वा ।

॥ १० ॥

माला जुयागु गुगु आतक नं मलूगु
लू थें जुईगु उगु वस्तु छ नाप लाय्वं ।
हे सुन्दरी, बिब जितः जिगु वस्तु तंगु
याकाव तृप्त दिलया रसगान छंगु ।

॥ ११ ॥

विनाशया जलय खः रंगरूप धैगु
 धात्थे छ खः क्षणिकयागु किपा मदैगु,
 संहारयागु छ कतांमरि खः अवश्य
 छं थाय् भुले जुइगु छाय् थन हा मनुष्य ?

॥ १२ ॥

नां दंम्ह भिम्ह अति उच्च चरित्र युक्त
 छं छुं मस्यू गुलि जि कामुक नीच भ्रष्ट,
 हे सुन्दरी, जि छ मदय्क रगाःहा प्यासी
 ह्लाः फे चवना बिब जितः रसरूपराशि ।

॥ १३ ॥

अत्यन्त पीडित जि छंगु कटाक्ष वाणं
 जि माःगु याय् मफुत हा मन खिन्न खिन्न,
 छ नाप लाय्त गुलि तोह चिनाः जि ज्वीगु
 मुस्काःगु हिस्सि दुगु छंगु व ख्वाल स्वयंगु ।

॥ १४ ॥

त्वाःबाः खनाः गुलिसिनं जिगु गय् खं ह्लाः ज्वी ?
 छं नं जितः श्व बदमास गज्योम्ह धाः ज्वी,
 धात्थे जिगू थुगु श्व चित्तस लाःगु घाःपाः
 लंकेत सुं मडु जितः छ विना सहारा ।

॥ १५ ॥

श्व चित्त चंचल पनां पन्य हे मज्जुगु
सौन्दर्य रूप गुलि छंगु मिखास वैगु,
कर्तव्य ज्ञान जिगु हा बमलाःगु सःखि
जिके चियेत श्व नुगः मदु माःगु शक्ति ।

॥ १६ ॥

प्याःचाः गुलि छ सह याय् भफयाः वया जि
यानाव दान रसरंग जितः दया त्ति ।
संसार नश्वर थुकी फुक नाश ज्वीगु
आनन्द दुःख फुकया उलि हे सखा म् ।

॥ १७ ॥

सासः छम्हू श्व दतले थुकियात सिंति
खः छ्वय्गु पाप मबुसे रसरंगया ति,
ह्लाः छंगु नायुगु दिकाः जिगु दग्ध छासी
सासः श्व छ्वय्गु जिगु अन्तिम धाम प्राप्ति ।

॥ १८ ॥

बाः वंगु जोवन छको थन वा छ हानं
श्वाभःगु इन्द्रिय फुकं जिगु न्हूगु या छं,
ईयात त्याक्यगु कला मखु अःपु रीत
संसारयागु नियमय् च्वन्यमाः समस्त ।

॥ १९ ॥

निर्धक्क यक्क मतिना न त छन्त याय् ज्यू
 यक्खंक्क छं न मतिना जिगु लागि याय् ज्यू,
 खुयाः मखूगु पहलं जुइ माःगु झीपिं
 समाजयागु खिपतं कसिना व च्चंपिं ।

॥ २० ॥

खः छंगु ब्याक्क जिगु नं जिगु ब्याक्क छंगु
 स्वाकाः नुगःलिस्य नुगः मदु भेद याय् नु,
 ल्लाः छंगुली जिगु तथाः प्यपुना व ज्वी नु
 थ्व झीगु हाकुगु वियोग चटक्क ह्वी नु ।

॥ २१ ॥

झीसं थ्व झीगु मतिना मखु थें ब्वलंके
 याय् याय्गु झी मिलन ब्याक्क सुलाः खुयाः हे,
 खुयाः सुलेगु मतिना मखु निन्दनीय
 धाय्माः परन्तु थय्य याय्गु प्रशंसनीय ।

॥ २२ ॥

खः वैगु सुम्क तिमिला व क्यबय् सुलाः हे
 भंभः वयाः रस त्वनाः वनि वं खुयाः हे,
 सुलाः खुयाः व मतिना गुगु याय्गु झीसं
 तच्चः जुयाः वनि अवश्य वयागु मू झं ।

॥ २३ ॥

संसार सागरस यक्व मिसात जिं खं
मखं छजोम्ह छम्ह नं तर सुं गनं नं,
हचय्कागु सत्य मखु जिं नुगलं धयागु
सौन्दर्य छंगु श्व हिंसि गुलि पूर्ण जाःगु ?

॥ २४ ॥

बांलाःगुली मदु छ जो छ जि योम्ह बांलाः
ख्युंथास छ्वःगु चिकुलाय् छ मियागु ज्वाला,
यात्रा श्व जीवनस जिं छ म्हयाम्ह पासा
नायं जुये तर मज्यू दु निषेध वाधा ।

॥ २५ ॥

म्वाना चवनेत छ मदय्क मगाःम्ह खः जि
ह्माय्कं दुन्यैह्मा छ मज्यू तर छन्त जिं थी,
छव्य्माः मि दन्दन मनय् मखु धागु छुं हे
म्वानाः जि च्वं च्वन्य मछिगु कुं-मि नुनाः हे ।

॥ २६ ॥

यय्वं जितः छ उलि हे ययमाः जि छन्त
धाय्गु श्व सत्य मखु खः तर लोक स्वार्थ,
यय्काः व तःगु दु कि छं सुइतं धकाः व,
शंका जुयाः च्वनिगु हा ! मन खिन्न ज्वीक ।

॥ २७ ॥

छं छुं खँ ल्लाःगु खन्यवं सुईतं ह्लिला सः
 जितः जुईगु नुगलय् उम्ह योम्ह ज्वी छं,
 स्वार्थी मनुष्य मतिनास व स्वार्थ झं थी
 मुक्कं छ याय्त जिगु हे जि असाध्य लोभी ।

॥ २८ ॥

स्वार्थान्थ खः जि जिगु हे जुइमाः छ मुक्कं
 छाय् नत्रसा थ्व मतिना पर स्वार्थ नापं ?
 थ्व स्वच्छता पिरतिया गन गय् व ल्वीगु
 यानाः व छन्त मतिना मखु जि व ल्यैगु ।

॥ २९ ॥

छं योगु याक्य बिइमाः छ जि योम्ह खःसा
 परन्तु जि मफु थ्व याक्यत छुं न्ह्यज्यानाः,
 तोता छ्वयेफु मतिना बरु मेगु याय् वा
 न्यानाः मियाः रस व रूप व काल ह्वी वा ।

॥ ३० ॥

वाथः जि थय् सहज थः कतिलाक्य सःम्ह
 थःथःगु दुर्बल मनोरथ स्वीक्य यःम्ह
 सामर्थ्य छंक्थ दतसा मतिना अगाढ
 छं काय्फु लोकस छ हे मखुला अगार ।

॥ ३१ ॥

मेपिन्त धाय्त गन थ्यं थ्व छक्वः लनाः स्व
 धैतःगु लोमन कि छं थव ख्वाः थमं स्व,
 सामर्थ्यं याय्त मफुम्हं छु पवनाः जुयेगु
 ब्यूसां छु याय्त थन ज्या ख्यल्य हे मफैगु ?

॥ ३२ ॥

जिं दोष बीमखु छतिं जिमि योम्ह छन्त
 छं यत्थे या तर सदां छ जितः पवित्र,
 न्ह्यानाव च्वंगु खुसिचा गथ्य पू मज्वीगु
 छ नं निरन्तर जितः जुइ न्हूगु न्हूगु ।

॥ ३३ ॥

तृष्णा समान छिये थाकुगु दै छु मेगु
 तृष्णा थ्व पार मजुसैं गन बोधि त्वीगु ?
 संसार झीगु जुइ बीगु प्रकाश खःसा
 तृष्णा थ्व खः न दुगु दै न लिपा थ्व झीत ।

॥ ३४ ॥

दथ्वी वयाः लँपुस विघ्न जुयाः थ्व च्वंगु
 तृष्णा फुनाव तिनि जीवन झल्ल थोगु,
 निर्वाण मुक्ति फुक याउँक प्राप्त ज्वीगु
 मात्सर्य लोभ मद मोह समस्त पवीगु ।

॥ ३५ ॥

तृष्णा अपार खुसि खः मफु छीत अःपु
 तृष्णा मछीक गन शान्ति व झीत दैगु ?
 अंगूर न्हाय् मडुगुलि उम्ह छट्टु ध्वंचां
 धाःथें जि नं फुगु थ्व धायगु देह कच्चा ।

॥ ३६ ॥

क्वेय् ला व खं व ह्लि खितय्त भुनाव छयंगू
 दय्काव तःगु मखुला थ्व शरीर छंगु ?
 ध्वग्गी नवःगु जुइ देह मदय्व प्राण
 सिर्ति मखा फुक थुकी अभिमान मान ।

॥ ३७ ॥

द हे मदैगु गुगु मन्त धकाः छु शोक ?
 खः नाशया लँपुस उन्मुख ब्याक्क लोक,
 बिनाशया जलप खः रँगरूप धैगु
 धात्थें छ खः क्षणिकयागु किपा मदैगु ।

॥ ३८ ॥

संसारयाम्ह छ कतांमरिचा अवश्य
 भुले जुयां छलिस्य गय् जुइ हा मनुष्य ?
 आदर्शयागु गुंचवकां ऋषिपिं ववफाय्त
 मामां छिपि जुइगु थय् तप भंग याय्त ।

॥ ३९ ॥

यानाः व मोहनि जितः दुगुचा दयेकाः
छं भोग बीगु कि यनाः लहुति माजुया थाय् ?
या यत्थे या जिगु थ्व होश हवास मन्त
खाली निरन्तर व्यथां जिगु चित्त भ्रान्त ।

॥ ४० ॥

न्या म्वाःम्हयात पुखुलि लिक्कयाः तयाः बैय्
व संगु छट्पट् जुयाः गुलि योगु छं स्वय् ?
वासः थ्व लोकस छु थःत मयोगुयात
छं नं जितः मयल का छु थुकी विवाद ?

॥ ४१ ॥

हे चित्त, शान्त छ जु काय् मत्थ भ्रान्ति म्वाःगु
उत्थानया लँपुस खः थुगु मार वःगु
थ्व मार त्याक्व मफुसा जुइ छंगु ह्लास
सो सो पियाव च्वन ह्लाः लम्हुयाः विनाश ।

॥ ४२ ॥

धिव्कार गय् थथ्य छ नीच व भ्रष्ट जूगु ?
धिव्कार छंगु गय पौरुष शौर्य तंगु ?
त्वःला मिसा छम्ह लिनाः थथ्य ज्वीगु छन्त ?
आसक्त ज्वीव जुइयो खनि मार्ग भ्रष्ट ।

॥ ४३ ॥

छं सुन्दरी गुम्ह धकाः लिउनें व न्ह्योनें
 स्वःला छक्कः खुनु वयात दुग्यंक गळ्लें ?
 छ्यंगू म्हिचास न्हि खि, खे स्वथनाव दंक
 बांलाःम्ह धाय्गु गथ्य छं फुक सीक सीक ?

॥ ४४ ॥

वा फय् दिनाः लुइगु ह्यांगु निभाः समान
 स्व आः लुया च्वन जिके गुलि स्वच्छ ज्ञान,
 खः प्राप्ति भिगु थन मंगल युक्त त्याग
 तोताः सहस्र उगु राग जुयाः विराग ।

॥ ४५ ॥

तोताः फुकं जगतया उगु चालमाल
 स्वामी जुये सकसियां जि जुयाः निहाल,
 सौन्दर्य शान्ति सुखया चिर मूल त्वीकाः
 आनन्द सागरस च्वं वन्य सार थ्वीकाः ।

॥ ४६ ॥

गाम्भीर्य छंगु दिलया अनुमान याय्त
 सौन्दर्य छंगु गुलि ग्यंगु धकाः स्वयेत,
 ई थाय् व दुःख सुख व्याक्क लिसे अभिन्न
 अवश्य हे मखु जितः थन छुं अमूर्ण ।

॥ ४७ ॥

स्वांमा सिमात मुखलि व चुलि पिदंगु
 ध्याचः चुलू लँपु फुकं गन छां बुं धैगु,
 स्वःस्वःगु थास लख हे मदु ख्यो बुं मन्त
 तृष्णा समान मदु सागर छीत झीत ।

॥ ४८ ॥

स्वय् हे मयैपु जुइ देह मदय्व प्राज
 ह्याय्पं मिखा म्हुतु थुकी थ्व दयां छु याय्पु ?
 छुं हे त्यनी मखु ह्यायागु कुचात ब्याक्क
 दिनाशया लँपुस आतुर दक्क फुकक ।

॥ ४९ ॥

ह्लाना छ्वयेत अत्य छुं थन युक्ति दैला
 उत्तेजना उगु हनं लित वय्क्य फैला ?
 तृष्णा मतोतु थन जर्जर देह जूसां
 का सार दैगु गन सो लख ब्याक्क सूसां ।

॥ ५० ॥

दारिद्र्य शोषण थुकी मखनाः व अन्त
 कर्तव्य देश प्रति लोमन लाकि छन्त ?
 थय् कामिनी कलशयागु जुयाः पिपासु
 छं थःगु जीवन अमूल्य छु याय् त्यनागु ?

॥ ५१ ॥

कामं प्रमत्त लँजुवाः गन छंगु लक्ष्य
माःसा थ्व छयों तकन देश निमित्त छायागु,
व छंगु शौर्य प्रण तोफित गय् छु जूगु
म्वाः ला विचार तय छुं थ्व देशयागु ?

॥ ५२ ॥

नेपालया सुख समृद्धि थकाय्गु भारा
हा लोमना वन फुकं गथ्य छं मचाःला ?
संहार ज्वीन छ मिसा छम्हयागु निम्ति
धिवकार खः थ्व जुनि दुर्लभ छंगु निम्ति ॥

॥ ५३ ॥

नेपाल तुल्य मदु मेगु थ्व शीत छुं नं
कासेलि जन्म पुत्यमाः थुकियागु मू नं,
अस्तित्व झीगु मदु छुं अतिरिक्त देश
सेवा व याय्गु मतिनां थुकिया अशेष ॥

॥ ५४ ॥

वा वा धकाव थन छन्त करोड ह्लाति
सःताव च्वंगु दु कयनाः व विदीर्ण छाति,
वै च्वंगु क्वाःगु खवविधाः गथ्य छं मचाःगु
दायित्व थःगु फुक तोतुगु छं गज्योगु ?

॥ ५५ ॥

सीत्यंगु भ्रान्त युगयागु कयाव मोह
 वैच्वंगु क्रान्ति युगया गुगुयागु द्रोह,
 म्वानाव च्वंगु श्व इलय् थन छुं मयासे
 धा धा वशय् च्वन्यगु छाय् शर कामयागु ।

॥ ५६ ॥

द्वारिद्वय दन्दन छ्वया च्वन देशवासी
 हा ज्वीगु कीत सरि छट्पट दाःगु खासो,
 यानाः नयेत मलुयाः थन रोजगार
 भःभः न्हुयाः गुलि वनी परदेश दूर ।

॥ ५७ ॥

यानाव छाब थथ्य जितः जिगु दोष धा छे
 निर्दोष भावुक जि खः जिगु मूर्खता नं,
 छत्ति जितः मदुगु श्व अधिकारयात
 कायेगु लागि सं जुयाः जि जुयाव भ्रष्ट ।

॥ ५८ ॥

शुक्लं बियाव जिगु पुञ्जभुयात ध्वानाः
 नीलः हयागु व तुति पिन्य थ्यंक श्वानाः,
 छं यस्त घोर अपमान जितः कं हाय्काः
 आः स्वाय्गु गय् जि झसुकाः खबियात मुंकाः ?

॥ ५९ ॥

धिक्कार छन्त मदनैत जितः व वैत
 धाधां व भर्तृहरि तुल्य जुयाः विरक्त,
 वैराग्य काः वन्यत खः छ जितः व्वनापौ
 ताःचा छ चाय्वयत धुकू जिगु काव्यया थौं ।

॥ ६० ॥



निगूगु सर्ग

बिदा जि ज्वी त्यनाबलय् छ छाय् वया लँ न्ह्यःपनाः
छु याय्गु छंगु मन्सुवा, छु याय्गु छंगु मन्सुवा ?
बँ ल्ये थनाः, भुखाय् जुयाः जि थाय् वयाः छु याय् त्यना
मिखाकुलि हिसी भुनाः प्रहार छाय् थ्व याय् त्यना ?

॥ १ ॥

जितः थ्व काम वासना, जितः थ्व घोर यातना
जितः छु जूगु थय् थन जितः थ्व छाय् विडम्बना ?
जिके ग्व आत्म-संयम, नुगः चिनां चिये मफु
दुनीन नाशया ध्वपय् हरे पनां पने मफु ।

॥ २ ॥

पतंग थें खनाः मत जि हुर् हुर् छ्वैन रे
गनाः गनाः जि लःफुति गनं मदय्क स्वीन रे
व छ्वःगु वेदना दिपय् जितः उनाव छ्वैन रे
गनं मदय्क विश्वस जितः फुकाव छ्वैन रे ।

॥ ३ ॥

छु याय्त जन्म खः जिगु समस्त लोमना वन
जितः श्व सोतिपाय् तयाः विनाश लैय् यना चवन,
वयागु हिस्सि भय् बियाः निथुक्क हा, जि प्याय् धुन
वयागु रूप बाः वयाः जितः स्व च्वीकुं यन ।

॥ ४ ॥

ल्लिलाः ल्लिलाः मुसुं मुसुं नुगःखँया लसां ततं
द्यनाव च्वंगु इन्द्रिय थनाः जितः छु याय्गु छं ?
प्यपुंक छन्त घय् पुनाः नयाः सहस्र चुम्बन
जुयाः अपार आतुर, जिगू श्व मन्त जीवन ।

॥ ५ ॥

पनाः जिगू सुमंगल, वयागु छाय् छ पंगलः ?
मछाः मज्जूह्म मन्मथं व पञ्चवाण कय्कल,
लिहाँ छ हूँ, लिहाँ छ हूँ; वये मते जिथाय् थन
जि म्वाय् मयो, जि म्वाय् मयो, जुयाः न्हिथं अकिंचन ।

॥ ६ ॥

जितः क्वपवाय्त वःह्म छ पिशाचिनी छ पापिनी
व छंगु रूपया चुपि जितः कियागु छाय् थनी ?
जिगू व शक्ति साहस समस्त ख्वाउँका छ्वयाः
जितः विनाश याय्गुली छ छाय् न्ह्यज्यां न्ह्यज्यां वया ?

॥ ७ ॥

छखें मयो धयां चवना, उखें छ हे ह्यायां चवना
विचित्र हाल थय् जिगु गथे वनी व हा लना !
प्रकाश पुञ्ज घय्पुनाः सदां चवन्हाय माःह्य जि
महान्धकार घय्पुनाः, जि जूगु छाय् श्व निर्धिनी ?

॥ ८ ॥

मिखास वैम्ह झलझली सुरम्य रूपया कलि
कटाक्ष वाण कय्कुकुं बियेगु ला जितः बलि ?
हरे ! बिया श्व सासना जितः छु याय छं त्यना ?
गज्योगु दग्ध कामना, श्व वःगु छाय् जिके दनाः ?

॥ ९ ॥

चटक्क जि न तोत्य फु न वं जितः श्व थःम्ह धाः
बिचय् जि काःम्ह खः थन, जिगु गज्यागु दुर्दशा ?
न ल्ह्वय्फु घुर्के हे न फु, छु याय्गु छन्त जि थन ?
गज्योगु जूगु थौं हरे ! जितः श्व क्रूर वन्धन ?

॥ १० ॥

न हात्य ज्यू न खवय्गु ज्यू मछिक स्वाय्गु पाः फयाः
सुया भरय् चवनाः हरे ! जि स्वाय फेगु गय् जुयाः ?
जि सीन सीन सुं मडु, जितः छ हे सहायता
महान्धकारया धवपय्, तुनाः जि ज्वीन बेपता ।

॥ ११ ॥

मयो जितः मयो जितः श्व म्वाःगु वेदना कयाः
 ततःमतः क्यने मयो विदग्ध यातना नया ?
 छु याय्गु छन्त जि कयां न मान दान दैगु खः
 विचाल या, विचाल या, श्व सारहीन कार्य खः ।

॥ १२ ॥

छजोम्ह मेम्ह दैमखु विध्वंस याय्गुली तप
 दु छंक्क माःगु चातुरी क्वफाय्त तोफिकाः जप,
 जपी तपी अनेकपि कटाक्ष छंगु कःगुलि
 विनाश जूगु बाखनं दुजाःगु सो पुराण झी ।

॥ १३ ॥

छ श्रेयहीन प्रेय खः जितः श्व म्वाय्त श्रेय माः
 श्व प्रेय तोत्य थाकुयाः जितः श्व घोर यातना,
 श्व वःगु प्रेमया प्रति घृणा छको दना छ वा
 मखू श्व रूप माधुरी धकाः जितः सुबोध या ।

॥ १४ ॥

जि नीच खः जि अष्ट खः गुज्याःगुली पलाः छिना ?
 मत्योगुली मज्यूगुली जि फय् समान ब्वां वना ।
 श्व ताप खः श्व पाप खः परन्तु यो जितः श्व हे
 जिगू श्व बाहु पाशसं सदां तयाः चिना तये ।

॥ १५ ॥

छु योगु याय्गु पाप खः ? मयोगु याय्गु पुण्य खः ?
गज्याःगु चक्र चाल श्व ? हिलाव सत्य न्हूगु हय्
मत्योगु याय् मज्यू गुगुं, मनीगु याय् मज्यू गुगुं
निषेध तय् मज्यू गुगुं, परन्तु याय्त्त योगु छुं ।

॥ १६ ॥

प्रमत्त भाव बाः वयाः निशा व न्हू जुया वइ
मुखू न्हिली मुखू ब्यनी व श्वःगु कोकिया सले,
प्रसन्नता ब्वया जुइ, सिमाहलं, सिमाहलं
जि जक्क सुम्क छाय् च्वने मयासे न्हूगु सिर्जना ?

॥ १७ ॥

छ सुन्दरी, छसुन्दरी, छ पापिनी, छ मन्खुनी
मयाय्गु शत्रुयात्त नं दु याःगु छं जितः थनि,
मुल्य तयाव गः किये छ साप साप सः खनी
सुदै जगत्स मेम्ह थय्, छ थें विश्वासघातिनी ?

॥ १८ ॥

ह्लिलाः ख्वयाः, ख्वयाः ह्लिलाः जितः मकंगु छं छु दु ?
उलाः उलाः नुगः फुकं जितः मक्यंगु छं छु दु ?
उलाः कुलाः जिके दुगु मस्वःस्य च्वंगु छं छु दु ?
विश्वासघातिनी जुयाः परन्तु थौं श्व जूगु छु ?

॥ १९ ॥

षवित्र धाम भाःपियां छ जा खिखांमुगः खनी
 महान छन्त भाःपियां छ तुच्छ फैलिचा खनी
 छ सुन्दरी धकाः धया, महत्व जि बिया थनि
 नवःह्य ध्वगिनाः फुकं छ जा पिशाचिनी खनी ।

॥ २० ॥

बुँ छेँ व काय् कलाः फुकं मधास्य च्वापु ग्वीं वने
 धयां श्व पंगलः वयाः जितः न्ह्यपं वया च्वन ।
 श्व पापया खलाबला दुकाय्त् आत्म-चिन्तन
 श्व याय् व याय् मज्यू धयां गज्योगु जूगु हा थन ?

॥ २१ ॥

गुँ श्वय्क हालि कोकिल थनाः थनाः मुखू चुलि
 सुबास भाव बाः वयाः समस्त न्हू जुया वइ,
 मुखू हिली धुकू क्नी व ब्वःगु पंछिया सलं
 खुसी जुया ब्वया जुइ सिमाहलं व स्वांहलं ।

॥ २२ ॥

जितः श्व म्वाःगु गन्थन जितः श्व म्वाःगु वन्धन
 कर्तामरी सरौ जुयाः हुया च्वना जि प्याखन,
 अहो श्व छंगु रुपया जितः कठोर वर्तन
 श्व मोहनी जितः तयाः दु ख्वय्कुगु निरन्तर ।

॥ २३ ॥

छ न्होन्थ हे च्वने मते मयो जितः मयो जितः
चटक्क चपफुना छ्वये थ्व क्वातु आशया खिपः,
प्रबृत्ति कामया थनाः छु याय् त्यनाः थौं जितः
जितः थ्व दास याय्गुली छ छाय् न्ह्यज्यां न्ह्यज्यां वया ?

॥ २४ ॥

प्रकाश पुञ्ज पाचिनाः सदां च्वह्वाय माःह्य जि
थ्व अन्धकार घय्पुना हरे छु जूगु निर्दयीः
गुजुं तयाव चित्त थ्व जि म्वाय फँगु गय् थन
जि अल्मले जुये मयो विदग्ध सासना नयाः ।

॥ २५ ॥

अपार शक्ति सागर अपार रूप छं गुण
सहर्ष प्राप्त याय्त थ्व जिगू प्रयास खः थन,
थ्व छंगु रूपया जलं पिकाल पोर वेदना
जि सुम्क सुम्क छाय् च्वने मयास्य न्हूगु साधना ?

॥ २६ ॥

जितः सहाय सुं मदु जितः छ हे सहायता
मयाय्व छं सहायता जि ज्वीन ज्वीन बेपता,
दु छन्त आशिका जिगु सहर्ष या जितः क्षमा
जि छंगु हे भरय् च्वना थ्व दुःख छाय् स्वयाच्च्वना?

॥ २७ ॥

जितः मधाःगु छं छु दु, जितः मयाःगु छुं छु दु
 नुगः उलाः उलाः फुकं जितः मन्यंगु छं छु दु ?
 समस्त थः नुगः बियाः जितः मय्यंगु छं छु दु
 विश्वास घातिनी जुयाः परन्तु धै चवना श्व छु ?

॥ २८ ॥

छ नक्चरी छ डंकिनी छ नीच भ्रष्ट पापिनी
 जि मूर्ख धाःगु छं गुलि, मयाय्गु याःगु छं उलि,
 समस्त विश्वया घृणा जिथाय् मुनाव वा छिपि
 थयें वयाव थुक्क या छु याःगु थौं श्व निधिनी ?

॥ २९ ॥

अन्याय याय् मज्यंगु हे दु याःगु छं जितः दनि
 जितः छु जक्क छं मधाः परन्तु आस्य जि धया,
 बहे खँया पुसा जुयाः जितः दु याःगु छं घृणा
 जितः छु फुति याय्गु छं जितः छु हांक याय्गु छं ?

॥ ३० ॥

श्व झीगु त्वापु ल्यं दइ श्व झीगु जन्मकाःछि हे
 सुयागु दोष खः थुकी निसाफ छः भविष्य हे,
 ह्लिला छ्वयेगु ख्याः मखु छु जन्मया श्व दुश्मनी
 जितः छ तुल्य दुश्मन जगत्स आः सु दै थन ?

॥ ३१ ॥

नुगः उलाः उलाः क्यनाः विश्वासयागु बः बिया ।
छ सत्तिनाः जिथाय् वल, जिनं छ सिन्धु भाःपिया,
श्व छीत माः जिके बल अपार जि धया च्वना
परन्तु जि श्व थौं थुल छ ला व तुच्छ धः खनी ।

॥ ३२ ॥

बिलं मकैगु दान व पवनां मबीगु आः जुल
विश्वासघात यात छं धकाव धाय्गु त्वह छु दु ?
छ स्पूह्य थूह्य छुं मखु जितः श्व जूगु संकट
समस्त ह्यग्स चुं थलाः जितः विनष्ट याःह्य छ ।

॥ ३३ ॥

श्व चित्त ख्वैगु धर्धरी छ जिह्य याय् मखंगुली
जुईगु ताप थःथमं श्व छंगु आश मन्त दः,
पतंग थें खनाः मत जि हुर् हुर् छ्वैन रे
गना वनाः जि लःफुति गनं मदय्क स्वीन रे ।

॥ ३४ ॥

परन्तु न्ह्यागु ज्वी थव्यु थुकिं जितः भिनं भिन
क्वब्बी मफैगु भार श्व, स्व थःथमं चिलावन,
सु खः जि धैगु जि मस्यू जि शक्तिया पुचः खनी
समुद्र याय्फु लःफुति, पहाड याय्फु धूकुति ।

॥ ३५ ॥

जितः श्व काम वासना जितः श्व घोर यातना
 जितः छु जूगु थय् थन, असह्य पीर वेदना,
 जिके श्व आत्मसंयम नुगः चिनां चिये मफु
 दुनीन हा विनाशस नुगः तयां तये मफु ।

॥ ३६ ॥

श्व ई, श्व थाय् जितः दुगु, दु याय्त आत्म-चिन्तन
 श्व व्यर्थ छवय् मर्यू धयां गज्योगु जूगु हा थन ?
 जुयाव शूल थौं हरे दु च्वंगु थौं जितः सुया
 छु याय् छु याय् विमूढ जि विचार शून्य थें जुया ।

॥ ३७ ॥

घृणात व्याक्क वा मुनाः जिथास वा दनाः दनाः
 ह्लि खै व ई जुयाः छिपि वयात मोल ल्हवीक्य आः,
 छ नक्चरी शनिश्चरी बिखं छ जाःह्य खः परी
 दु याःगु छं प्रदूषित, जिगू श्व स्वच्छ जीवनी ।

॥ ३८ ॥

खवबि वईगु धर्धर व छन्त काय् मखंगुलि
 जुईगु ताप थः थह्यं व छन्त तय् मखंगुलि,
 जुयेत न्ह्यागु ज्वी थव्यु, थुकिं जितः भिना वन,
 पनां पने मफेगु श्व, अयें थमं चिलावन ।

॥ ३९ ॥

मुनाव देव दानवं विशाल मन्दराचल
चिनाव सःखि शेषया कठोर यात मन्थन,
असंख्य रत्न भूषण सुधा व सुन्दरी तक
थ्व धन्य ज्वीक मेदिनी व मन्थनं पिहां बल ।

॥ ४० ॥

गज्योगु शेषया विष उखें पिहां वयां चवन
विदग्ध विश्व ज्वीगु थें थ्व जूगु सो कुलक्षण,
समस्त त्राहिमां जुयाः छु याय् छु याय् जुया चवन
थ्व सृष्टि ब्याक्क आः थनि विनाश ज्वीगु हे जुल ।

॥ ४१ ॥

परन्तु गय् व शंकरं मुनाव छवःगु खः विष
थ्व छंगु मन्थनं जि नं विदग्ध ज्वीगु ब्याक्क खँ,
नुगः चिनाव संयमं गनं मज्जय्क तैतया
जितः थ्व जूगु तापत, सुवाः व भिगु याय् त्यना ।

॥ ४२ ॥

जिनं मकैगु खः गुगु प्वनाः थ्व दैगु आः जुल
बिषाद याय्गु छाय् थुकी अवश्य ज्वीगु हे जुल,
जितः छ योम्हसां छु याय् छ पाप खः छ ताप खः
छ प्रेम मार्गया दथुं, जितः क्वपवाय्त्त वःह्म खः ।

॥ ४३ ॥

सदैव छंगु भिंगु स्वय्, सदैव छंगु ज्युगु स्वय्
 सदैव छन्त न्ह्युगु स्वय् छ भिंगु लॅय् न्ह्यज्याःगु स्वय्,
 जिनं थ्व नीच भ्रष्टताय्, सदां दुबे मज्जीगु स्वय्
 मभिंगुयात वां छवयाः व नीगु भिंगु याय्गु स्वय् ।

॥ ४४ ॥



स्वंगूगु सर्ग

वैगु क्वाः हिं मो ल्लुयाः थौं प्राण जिगु तोता वने
ज्वीक्व ब्रीमखु मेवया व जिम्ह खः व जिम्ह खः,
थौं श्व चुपिचां वैगु गः की वैगु हिं नित्यूक्क ज्वी
थःत नं श्व चुपि किया गः प्राण याय् उत्सर्ग जि ।

॥ १ ॥

बिन्ति चुपिचा जिगु श्व ज्या थौं पूर्ण यानाः द्यु प्रिय
थःम्हँ धैथे मन्त धाःसा स्वाय् सिबे नं ज्यू सिये,
मेवया यानाः वयात हाय थौं जि स्वाय्गु गय्
जिगु लॅप्वी धै च्वंगु व्याक्क विघ्न वाधा तंक छवय् ।

॥ २ ॥

अन्त निम्हस्या ज्यानयागू काल बेला थौं थुगु
आः छु याय् जिं, आः छु याय् जिं, याय माः जिं आः गुगु?
बुद्धया प्रति पूर्ण आस्था व्याक्क मुंकाः प्वः चिनाः
हे पुलां चीभाः जितः छं देशना छु बिया च्वना ?

॥ ३ ॥

न्यन्यत ह्यायं मदु जिके थौं जिगु थ्व अन्तिम वन्दना
गात जि आः खन्यगु छंके ऊर्ध्वगामी भावना,
धम्मपदया देशना नं थौं जिथाय् न्ह्यलुई मते
जिगु थ्व इच्छा पूर्ण याय् त्यल, छं जितः आः पन्य मते ।

॥ ४ ॥

ज्यानमारा ज्वीगु हे थौं पूर्ण तृप्ति जिगु खत
म्वाय्गु थुलि हे जुल निम्हेस्यां मय्त्ल न्यन्य आः छुं खँत,
ज्यानमारा ज्यानमारा वैत स्याय्त्त जि वय् धुन
वैगु क्वाः हि मो ह्लुयाः जि धन्य याय्गु थ्व जीवन ।

॥ ५ ॥

जिगु थ्व ल्यू ल्यू न्याय्त्त धे थें छाय् खिच्चात छु हाःवया
छाय् जितः ह्यमस्यूगु छिम्सं म्वाल् त्यां हुं सुम्क आः,
वं बिसेलि यातना थय् वैत छाय् जि बाकि तय्
भिन जितः थर्थे वनाः बरु वैगु हत्या याय्गु हे ।

॥ ६ ॥

छंगु प्राण थ्व छंगु हे मखु यत्थय याय् छं दै मखु
छन्त दय्कुम्ह हे थ्व दे खः दे विना छ, छ हे मखु ।
देशवासी खः जि तर जिगु प्राण जा जिगु हे मखा
वैत स्यानाः थःगु हत्या छाय् मयाय् जि छाय् मयाय् ?

॥ ७ ॥

छम्ह मिसाया निम्ति छं छाये प्राण तोता छवये त्यना
देश मदुसा प्राण छंगु दैगु धा रे गये जुया ?
प्राण छंगु थव छंगु हे मखु यत्थय याये दैमखु
छन्त दयकुम्ह हे थव दे खः थःगु चा लः फये बिधा ।

॥ ८ ॥

दुसुत ला गये ब्याक्क छंगु देश प्रतिया भावना
छन्त त्वः ला यायेगु थुकथं छम्ह मिसाया कामना ?
छं मताः ला ? छं मचाः ला थवःगु देया क्रन्दन
छम्ह मिसां यानाः हरे, थौं सिंह नं ध्वंचा जू वन ।

॥ ९ ॥

छम्ह मिसाया लागि थुकथं शोक चिन्ता कै जुया
छन्त लोकं हा, छु धाइ धर्म छंके मन्त ला ?
धैर्य साहस छंगु गन वन छन्त त्वः ला ज्वीगु थये
देशया प्रति याये मा'गु ब्याक्क ज्या त्वःमंगु गये ?

॥ १० ॥

म्वाय्त्त अःपुगु जुइत ह्यइपुगु देश झीगु थव दयकयत
छुं मयासैं च्चं चवना छाये ? छंत धिक्कार द्वःछिकः ?
लिचिल्य ज्यू ला त्वाः थलाः छयो मा'गु जूसा बीत नं ?
छंगु ल्याय्म्हसुयागु ज्वालां छन्त लोमंकल गनं ?

॥ ११ ॥

देशया अरमान शोषण जूगु प्यखयरं खक नं
 छुं मस्यू थें, छुं थ्व मखु थें, गय् छ च्वन्य फुगु थय् थन ?
 पशु मनूया भेद मदु छुं यदि छ थय् हे स्वाय्गुसा
 जूगु ज्वी ब्यु, बरु हुँ सिना हुँ, तुच्छ पशु थें हे जुयाः ।

॥ १२ ॥

ज्ञानया विज्ञानया छं स्वाःगु च्यूताः तय् मते
 दाःगु जासी कोत सीथें, ज्वीगु थें थन ज्वी थब्यु,
 थःगु हक अधिकार तंकाः थन मनूत स्वाय् थब्यु
 पशु छ खः व्यवहार पशुया न्हाबलें याना छ जु ।

॥ १३ ॥

जोलपा ल्हाः विनति यानाः न्हाबलें खख्वं छ जु
 पशु छ खः पशु कर्म छुकिया छन्त चिपनिप दैगु छु ?
 नय् मखंपि, त्वन्य मखंपि, छन्य मखंपि अपुःपुक
 जनत थन भः भः न्हुया च्वन स्वाय मछिना याउँक ।

॥ १४ ॥

वा वया च्वन पौ ज्वया च्वन दुनिन छेँ हे भ्वस्मुक
 चुलि पिकाकां न्याय्त्त वै च्वन गरल जाःपि सरंत,
 तर म्य मतिनायागु हालाः थन जि थौं गय् च्वं च्वना
 गय् थ्व जूगु थ्व जिगु व गन वन ऊर्ध्वगामिनी चेतना ।

॥ १५ ॥

थय् मनू नं पतन ज्वीयो थौं थ्व प्रष्ट खन्चवना
चेतना मत सीगु थुकथं भोग जिं याना चवना,
देश मदुसा दै जि गन थन, देश त्वःमंका चवना
छम्ह मिसाया आश काकां भण्म ज्वीत सना चवना ।

॥ १६ ॥

देशया छाती मि च्याःगु भोक रोग अज्ञानया
छाति दायाः ख्वैगु जनता म्वाय्त मछिना दुख जुयाः,
हा थज्योगू कठिन बेलाय् छम्ह मिसाया ध्याउना
कै चवना छं थःगु जीवन याय्गु ला बर्वाद आः ?

॥ १७ ॥

ब्याक्क झी सन्ततित म्वानाः च्वनिगु थन नेपालस
नय् मखंप्ति त्वन्य मखंप्ति पुन्य मखंप्ति याउँक,
फुक्क थन भः भः न्हुया च्वन म्वाय धैगु नां जक
देश मंकाः खः थ्व अय्नं थन दु भीषण शोषण ।

॥ १८ ॥

थःगु हक अधिकार तंकाः थन मनूत म्वाय् थब्बु
पशुत थें व्यवहार यानाः न्ह्याबलें म्वाना थजु,
बगु थन हे ब्वलंगु थन हे सीगु नं थन हे थजु
छं मताःला छं मचाःला धाय्गु ला न्ह्यागुं थजु ?

॥ १९ ॥

छाय् छ थौं थय् खिन्न दुःखित स्वैगु यानाः ध्याउना
छन्त ल्वःला चवन्गु यानाः छम्ह मिसाया कामना ?
दुसुत ला गय् ब्याक्क छंगू देश प्रतिया भावना
देश सेवा याय धैगू ऊर्ध्वगामिनि भावना ।

॥ २० ॥

स्वैत छं थय् प्रेम यानाः नित्य च्यूताः कै जुया
देश मदुसा गन व दैगु वीरपुत्र श्व देशया ?
देशया हे अंश मखुला रूप गुण यौवन फुक
मान मनिता दैगु ब्याक्क देशया सम्मान खः ।

॥ २१ ॥

छम्ह तृष्णा छम्ह हे ज्वी प्रेम छंगू शाश्वत
देशया निंति छ स्वाना ज्वीगु स्व सम्मानित ।
देश तोताः मेगु मदु छुं देशलिस्य व्यापक छ जु
देश अझ ब्रह्माण्ड सारा छंगु हे किचः थजु ।

॥ २२ ॥

भाव क्वबियाः स्वाःगु स्वाःगु माःगु तोफिका चवना
अधः पतनया घोर गाल्य हा जि क्वब्वाना चवना ।
वैत मतिना जिगु श्व सच्चा खःगु जूसा थौं थन
देशया निंति सदां जि छयो श्व मू हाय्का तया ।

॥ २३ ॥

जिगु दु स्वःलिस्य स्वय् मगाःगु देश च्वापुगुंया ववसं
वांगु ख्यः बुं खुसि व पाःचा धन्य याइगु जीवन,
विविध पंछी रंगीचंगी मधुर मे थन हालिगु
स्वां सिमाया थन दु प्यख्यं चव्य् कयं थें ब्वोइगु ।

॥ २४ ॥

थन दु थी थी भाय् व जाति अमिगु थः थः संस्कृति
ब्याक्क मुंकाः भिगु काय्गु झीगु खः देशोन्नति ।
देश बांलाः, जनत बांलाः किन्तु यक्व दु बेथिति
न्हगु युग वल, तर मचाः छुं अमिगु भीषण दुर्गति ।

॥ २५ ॥

तर जि थन चायाः थुयाः नं मफुम्ह याय् थय् निर्गुणी
जिगु च्वसा फुक तोधुला वन, जि छु याय्गु थय् थनी ?
जनत छांलाःसा अपालं जि नयाः छु तिले ग्यली
यक्व जनतां ती मखंसा जि तियां छु सम्म ज्वी ?

॥ २६ ॥

नय् मखंप्पि, ती मखंप्पि, ब्याक्क जनतय् सः थजु
व्यक्तिगत मतिना व छंगु ज्वीकि विस्तृत देशया ।
पाप शोषणया विरुद्धय् ध्वाय् ज्वनाः न्ह्यज्यां छ हूँ
छुं मस्यूगु छुं मथूगु अन्धकारय् जः छ जु ।

॥ २७ ॥

कलम चवय्काः खःगु खंकाः थःम्ह जनतय् कवि छ जु
 थःम्ह मांया दुरु त्वनागू सार यानाः जु मनू ।
 देशया सम्मान जूसा ज्वी छ नं सम्मानित
 देशया अपमान जूसा ज्वी छ नं अपमानित ।

॥ २८ ॥

छंम्ह कृष्णा छंम्ह हे ज्वी प्रेम छंगु शाश्वत
 देशया निम्तिं छ म्वाना ज्वीगु स्व सम्मानित ।
 देश तोताः छंगु छुं मदु देश नाप लिनाः छ हुँ
 देश अज्ञ ब्रह्माण्ड सारा शक्ति छंगु किचः थजु ।

॥ २९ ॥



प्यंगूगु सर्ग

झर झर स्वर यानाः झरं क्वां वै क्वब्बाःलः
 सिलि सिलि फस न्ह्याइ न्यासि चाई सिमाहः
 झलमल थिक स्वर्गं लुम्मुकः वै निभाः जः
 मधुर मधुर झंगः गीत हालीगु थ्वः सः ।

॥ १ ॥

कलकल खुसि न्ह्याइ स्वच्छतायागु ख्वाः ब्वै
 लुमुगु छवि ज्वनाः वै सत्यया पाठ स्यं वै
 तुयुगु यचुगु थी थी च्वापुगुंयागु माला
 सरगत लिस्य थीगू उच्चतायागु ज्वाला ।

॥ २ ॥

उख्य थुख्य जि हिला ज्वी झोलि तुम्बा ज्वनालि
 मन जुइ अन सन्ध्या सुम्क बासं च्वनालि
 गुलि स्वत उलि झीत प्रेरणा उच्च ज्वीत
 सतत जुइगु आतुर चित्तया वृत्ति स्वयत् ।

॥ ३ ॥

फलफुल वनयागू नय जिनं कन्दमूल
छु लुल नय वहे तुं साः मसाः भेद मय्ल
झलमल मत च्याकाः चन्द्रमायागु ज्योति
चवन्य छगु धुनि च्याकाः ध्यान यानाः सदा जि ।

॥ ४ ॥

नगुत जडित सर्गः फाय्त तपफीगु फांगा
द्यन्यत नरम धर्ती घाय् मुना तःगु लासा
लख अमृत समान च्वापु नायाव वःगु
छु मदु थन अज्यागु सत्य ल्वीकेत माःगु ?

॥ ५ ॥

दिक्यत शिर थ्व लोहों ज्वी जितः छिगु फुंग
लिधन्यत दु सिमाप्वः पाः गुं बल्लाःगु अंगः
छपु कलम व कापी न्हाबलें दे थ्व झोली
थुल कि परम भावं आखलं जि नवाके ।

॥ ६ ॥

मुथ जुइ दन्य ह्लापां माःगु शौचादि यानाः
सु छु थन थ्व जगत्या चिन्तना येक्य ग्वाकाः
चरम उगु रहस्य तेज्जु यानाव चाय्के
फुक फुक व जितः ज्वी सत्य छलंग दक्क ।

॥ ७ ॥

जिगु व प्रिय समाधि वैगु आनन्द धारा
 मफु मफु छिमिसं गय् कल्पना तवक नं याय्
 गुलि गुलि छ थज्योपि प्रेयसीं मोह बीगु
 मखु मखु थुकियागू छुं छति तुल्य ज्वीगु ।

॥ ८ ॥

ब्वन्य फु उगु समाधि खः मनूयागु योग
 तर तप वृत यानाः थःगु याय् वैत मंकाः
 थथ्य नियमत दय्काः श्वैत याये अनन्त
 अमर जि थन ज्वीगु घय्पुयाः दिग्दिगन्त ।

॥ ९ ॥

फुक इल व दिशाया खः जि स्वामो महान
 मखु मखु जिगु ज्योति छंगु ब्रह्माण्ड ध्यान
 गन दु थन निराशा ब्यावक हे झल्ल आशा
 गुलि न गुलि निकासा न्हावलें पूर्णतां जाः ।

॥ १० ॥

अभय अमर आत्मा काय्गु जि स्वंगु खास
 गुलि नि गुलि व तःधं श्रेयथा नं प्रकाश
 च्वनि यम व कुबेरं नित्य च्वामोल गाकाः
 वरुण तुति सिकः वै न्हूगु लःधार हाय्काः ।


॥ ११ ॥

ब्वनि जिगु ससुमांजुं तोत्र बांलाःगु दय्काः
 रवि शशि मत च्याकाः आरती याइ ब्रह्मां
 ऋतु ऋतुत वयाः नं स्वां-सि तःजीगु छायाः
 गुलि गुलि जिगु याइ प्रार्थना युक्त पूजा ।

॥ १२ ॥

सकल सकलताया सिद्धिदाता गनेद्यः
 जुइ अन जिगु ह्लाःपा भाव फिल्लय्त ह्लापा ।

॥ १३ ॥



सिद्धिचरणया कृति

नेपाल भाषाय्

१. सीस्वां	पिदंगु
२. फूस्वां	"
३. उर्वशी (खण्ड काव्य)	"
४. वदस्वां	"
५. लुभुनी (खण्ड काव्य)	"
६. तृष्णा "	"
७. उत्तारा विलाप	पिमदंगु
८. बाखं व निबन्ध	"
९. भूमिका मुना	(प्रेतय्)
१०. मूस्वां (कविता मुना)	

नेपाली भाषाय्

१. कोपिला	पिदंगु
२. मेरो प्रतिबिम्ब	"
३. उर्वशी	"
४. कुहिरो र घाम	"
५. तिरमिरे तारा (बाल कविता)	"
६. बाँचिरहेको आवाज	"
७. सिद्धिचरणका प्रतिनिधि कविता	"
८. मंगलमान	"
९. ज्यानमारा शैल	
१०. आँसु	
११. बालिवध	
१२. जूनकीरी	
१३. भीमसेन थापा	
१४. शवरी	
१५. आत्म-विलोना	